

聖宋名賢五百家播芳大全文粹卷十五

賀啟

加職

賀王龍圖啟

洪景伯

伏審績著帥垣寵頒帝極虎韜奇秘仍嶺南紀之封
 龍叙高華遂冠西清之直實階從橐深豔儒紳恭惟
 安撫龍圖瑞世傑才鎮時雅望夙膺妙注垂踐要塗
 回方丈之船薦荐分一道下青冥之越越率十連果蒙
 宸展之褒進寓河圖之職諒超一節即踐六聯某蚤
 奉外臺迺瞻大府莫展仞牆之賀謾馳尺素之誠

賀陳天章啟

汪彥章

寵膺恩制榮陟近班朝論僉諧公望益峻伏惟慶慰
竊以國朝敷求謨明輔弼之佐必先文學近審之臣
諒微高世之盛名曷副一人之注意恭惟 某官師
選舊德籍圃清流道術通明冠冕當世詞華穎耀領
袖儲儒聊偃息于藩垣遂進升陞于書閣行聞召節入
正鼎司某服勤小官僻在下邑已託庇好之賜終依
陶冶之仁下情忭愉未易敷罄

賀汪寶學啟

熊子復

伏審績著坤維寵頒宸極陞冠寶儲之職實階台輔
之除一札疏榮百城增重竊以大藩總四路之師旅

元侯獨擁于師旄延閣萃兩朝之圖書學士首聯于
從索惟精神折衝之益遠故體貌厲節之愈新恭惟

制置閣學侍郎毓粹昭回儲精峻極早冠大廷之

擢久聯清禁之班昨自甌閩改臨巴蜀如張文定當

至和之際鎮靜以綏遠方若趙清獻在治平之間廉

平以變舊俗規摹兼擅于前輩風采凜傳于異邦宜

渙明思以彰殊最雲章奎畫聊進寓于隆名台象斗

樞位入陪于基命某猥聯朝序喜聽除書玉壘銅梁

悵莫趨于賓幕介圭几舄冀即迓于都門

賀為顯謨啟

周可行

伏審疏渥中宸陞華內閣寶儲寓直宴鄰德禁近之班
 繡指趨還獨茂神畿之最有識交頌不謀同辭恭惟
 提刑顯謨大卿蘊藉醇深規摹閱遠毫端扛百斛之
 鼎胸次容萬頃之波夙妙簡于帝衷久榮躋于卿列
 寵垂持索偶迴方丈之風任屈乘軺復近長安之日
 兩躡臨于會府三徧歷于提封玉節宣風既光華於
 原濕錦囊留韻更彈壓于山川囹圄空而民枉伸輦
 轂近而帝聰達文謨丕顯果參奎璧之藏舜協重華
 即赴風雲之會某猥當煩劇夙荷知憐但竊欣于得
 輿阻趨慶于成履使有功見知則悅將勞還歸克后聖

丕命其承即躋獻納

賀張徽猷啟

黃伯淵

光奉明綸榮陞邃閣伏惟慶慰恭惟 某官業資久
 大才抱柔嘉學與探乎聖心任重志乎天下由明王
 敷德以懷遠故智者乘時而立功第進禁林尚留漕
 運畢誠入拜諭自于供軍蕭相受封爰疇于給食仁
 觀迅召別聽登庸某云：

賀廣守加待制啟

胡仁仲

伏承南塞安甯既獲長城之御中宸優眷寵陞延閣
 之華方慙賀牘之未修遽辱珍題之下貺玩詳于再

感悻交深伏以 某官忠結主知德諧人望控百蠻
之海道深藉淵謀識列聖之奎文進聯法從履此禁
嚴之地實為柄用之階某拜晤未期咏瞻無數勉祈
珍護密副上懷

賀林待制啟

何子建

伏承宸宸疏恩禁廷陞職逖聞顯擢倍切惟悰竊以
禁域西清廣文內閣傍近羣玉左腕延英寶劍鬱若
以中天眷文深然而左筭掌此者兼侍從論思之地
位是者必陪御背側之臣用為階梯多至丞弼伏以

某官學深賈鄭思拔常揚歷蘭臺載筆之司更柱

史記言之任久翔藩會數試政能果就拜于除書固

雅宜于素舉某叨蒙眷契尤慶寵音先辱瑤函第增

銘荷

秦叔厚

賀王英撰啟

伏審疏渥帝宸陞華^卷殿示舊臣之亟召還亞旅之
彝章有識相趨不謀同慶竊以將降大任天或勞之
未喪斯文人何畏彼是故枚臯小忍而嚴徐終與並
進賈誼見思而絳灌不能復搖歐公厄于巧誣而典
內制于至和坡老困于朋讒而承上旨于元祐道豈
終否器項晚成恭惟 宮使侍郎益藉醇深規摹閱

博辭坡入直既久侍于王言從索新除蓋深符于士
望暫違清禁即奉殊庭果陞麗正之聯仁復承明之
職遂倍幾務益展壯猷某受知殊常別德寔久第贊
門牆之喜莫陪賓客之趨

賀沈帥加待制啟

林豈塵

伏審渙命端宸陞班華秘承流宣化雖可為大丈夫
之榮增秩居官亦庶幾古循吏之賞郵音遐播輿議
允公恭惟安撫待制遠識際天宏材緯世文章古
人所不到事業今日之未聞螾蝓蚤結于深知華要
薦揚于臚仕方朝廷匪輕于外故任岳牧專用于詞

人張子高之相膠東先嚴賞爵龔少卿之治渤海毋
問鉤鋤課農蠶于下車之初戮鯨鯢于安瀾之日青
海無聞于傳箭潢池不見其弄兵坐收堂上之奇誰
是舟中之敵美歸士東征之勞寬聖君南顧之憂燕
寢香凝豈繼止戈之詠江城綠秀何慙賣劍之風課
政最以上聞疏寵恩而中出八郡喧騰于輿頌九重
願借其高名人皆有草木之知孰不為燕雀之賀某
夙蒙剪拂厚見周稱適欣躍之耳聞竟游揚而心喜
三十年門牆已遠未嘗聞故人之情二千里道路且
長不能從賀客之後願為紙筆之間敢布腹心之言

賀趙憲加秘監啟

孫大仲

茂著顯庸光膺褒典道山玉宇越陞中秘之華漢使
繡衣仍總外臺之峻官隨望重職以名清恭惟某
官靖深而秉彝莊重而履坦才豪無敵一洗而凡馬
空政妙有成四顧而全牛解早由簡拔多所踐敷乃
眷閔封屢將使指逮領平反之重尤資欽恤之良惟
歌詠之永騰尚容借寇示論思之有漸姑畀登瀛矧
藏室之清途實儒林之崇遇星應東壁地稱西崑顧
平日侍從之臣皆由其選在異時宥密之地非公而
誰實眾望之當然豈私期之獨爾某夙依大庇逆聽

新除莫陪賓客之趨但增寤寐之喜意傾彌切詞訥
奚殫

賀王漕加起居舍人啟

王望之

螭陞記言任專筆削隼換按部職在澄清所以建節
使于外臺彰朝纓于文陛底謹財賦致軍國于富强
昭明明策書舉春秋之凡例自非蘊折豪之精力負拱
天之榮才聿當虛位之辰豈副至公之選恭惟起
居學士氣衝斗極名震京師學通亡筮之書理勝論
都之賦一自決科漢殿通籍周行出頒詔條允洽二
天之詠入奉計最亟延三接之恩爰飛步于亭衛久育

材于近署次宸章于柏殿典秘計記于蘭臺諍臣七人
 夙推謇諤王畿千里嘗督轉輸京坻載集于見糧繁
 肯固彰于餘地昨以河出砥柱如竹箭以奔流郡立
 東平致金堤之壞決宣房未塞夷儀卜遷瓠子興歌
 正下淇園之竹原田發詠大懼厯陽之魚暫輟英賢
 式撫新邑期會簿書之急繕宗版築之勞祇役惟寅
 成功甚速水反故道免東海之桑田人服先疇識新
 豐之雞犬永無虞于昏墊實仰賴于神明既安堵以
 阜生將解龜而受代載加命數仍委事權當九重注
 意之初在列郡承風之地海岱之壤俗號富饒齊魯

之邦氣多舒緩諒宣寬大之詔用躋仁壽之期至如
 奉三尺之竹書克勤刺舉調千金之粒食無事誅求
 此又拚心計于研求乘笑霸圖于管樂良史之任聊為
 假道之資富民之封固可翹足而待某幸窺除目方
 切欣愉遠辱長牋過承謙損願言銘代無以喻云

賀漕使加起居啟

邵澤民

竊以古者設記言之官立司過之史職當汗簡固君
 舉而必書事及剪桐表王者之無戲爰自分漕兩掖
 通籍九門陪鹵簿于明光出參法從接公槐于文石
 入奉內朝最親咫尺之顏實草起居之注自非通止

索典墳之學挺忠肅恭懿之資則何以東帶影纓預
周行于螭陛懷鉉持槩約魯史于麟毫允屬時英克
符師錫恭惟 起居學士詞源沃日文律融春穎水
生賢占荀爽無雙之譽漢庭發策得平津第一之科
外參竹使之符歸踐石渠之署閱圖書于冊府方討
典經幹鹽鐵于縣官遠商功利自爾涉諍臣七人之
列足太倉九歲之儲廉施次骨之文而庶邦震肅不
假析毫之術而內帑充盈率經義以治財奉詔條而
集事爰膺妙簡聿副疇咨亟推進秩之恩更賴當官
之業昔張蒼以列侯之重主郡國之計書杜預以常

伯之崇領江淮之轉漕允資餘地兼總外臺分南董
之官曹運研乘之心術即侯上林朽貫復全盛于西
京大輅鳴鑿展崇封于東岱便入金鼇之署式揮玉
牒之文翹祝之誠實在如此云云

賀陳漕加直閣啟

毛伯穎

拜寵楓宸陞華芸閣屬公朝信賞之日增外臺持節
之榮恭惟 某官夙被眷知特膺時選方六飛之南
駐視百粵為近藩協濟軍須實煩心計事尅期而取
辦固非一端下不擾以告成斯為盡美休功藹著優
渥宜頒清遊始寓于瀛洲迅召行趨于天闕某言念

崇禎之通俯慙名位之卑面賀無因心馳情切

賀王守加直閣啟

汪彥章

光膺芝檢寓直蓬山式彰牧守之賢益重邊方之寄
伏惟 某官忠嘉世濟儒雅自將渾金璞玉之粹純
水鑑冰壺之瑩徹一麾敷惠最准向之列城五袴作
歌仰漢京之循吏聞今日桑麻之野皆異時荆棘之
場成績既優寵光難後芸香羣玉之府宜進躡于英
躔荷橐大明之宮將入參于邇列某晤離滋久仰止
實深曾馳慶之未遑辱貽書之先及眷言感愧曷罄
敷陳

建節

賀呂相建節啟

蔣子禮

伏審均儀罕席疏寵齋壇成命一頒懽聲四決竊以
裝度之平滄景始進于崇階令公之兼邠益本規以
破虜未有訂山河于盟府聳旄鉞于戎軒偃薄祠庭
闡遊廊廟永惟殊遇蓋有德以簡于皇衷仰揆元勳
殆無官可隆于異數富貴溢世而人不厭精神折衝
而國以尊故晉室之臚台司止參驃騎而漢侯之奉
朝請靡建將牙赫然王靈萃我哲輔恭惟 某官股
肱真主冠冕庶工忠順勤勞類孔明管樂莫能過雄
深雅健如太史崔蔡豈足多既取曰于層淵遂擎天

而作柱再獲涓濱之兆無煩商野之求運契時來更切安危之寄任重道遠但聞夷險之同已欣袞繡之歸益侈鼎槐之業某罷柔不武謬假節以護邊飄轉承流滄分符而坐鎮側聆制綽尤激懦懦投老何為每荷故人之戀戀倦飛滋久願棲廣廈之耽耽

賀汪相建節啟

汪彥章

誕布制麻榮分齊鉞即公台之舊望陞帝傅之新班恭惟 某官社稷宗工廟堂元老蕭曹興漢本豐沛之故人閔散佐周乃唐虞之盛際浩然去國倏爾星留萬里之山川隔九霄之日月雖聖君軫舊不忘附驥

以攀鱗而流俗妨功屢使跋胡而彙尾憤鬱既極精誠乃通力排壅蔽之私入奉清聞之燕植牙建纛坐兼金印之重列戟面槐遂至布衣之極由淵衷之感際故異數之便蕃矧黜歛之名區有平陽之望族閱古今之信史千載于茲兼將相之崇資一人而已何孤生之獨幸蒙餘潤以尤多恨違表著之班莫贊門牆之喜炎歆向未俊艾居中願調茵鼎之宜行復鈞衡之拜

賀張節使啟

張少瑜

疇庸秘殿錫命齋壇文武兼資益聳朝廷之望威名

素著薦隆輦轂之權渙號既頌師言咸穆惟近世將
旄之授多一時戰陳之功未有尹天子之一圻首參
侍從而能啟元戎之十乘備舉官儀考故事以僅傳
由中興而創見恭惟 某官學周經濟識洞幾微會
有作之亨嘉行所知之光大言忠而諒熟殿陛之履
聲教久而明絕閭閻之桴鼓乃者天臨帝籍雲矗王
城垂萬年不朽之規舉百世罕行之典不愆于素迄
用有成迨茲顯拜之孚始識宣勞之自凋戈蕩節獨
高京兆之風尺籍伍符遙改龍江之觀主恩方厚政
柄焉歸某偶屬乘軺阻陪賀厦濫從蚤歲接冠蓋于

班曹終愧珍羣望駕鸞于霄漢其為傾頌莫盡名言

遷秩 賀李帥遷秩啟

馬朝南

伏審天府第功雲章錫寵顯躋峻陟秩允答高勲外光
惟愷之謀內篤聖神之眷式為異數交慰輿情恭惟
某官明照幾先智周事表學識文武之大材兼道
德之全自任以當世之功名盡繼乎古人之事業內
昭王度庶政修明外暢天聲四夷屈伏惟湟中之新
境實隴右之故封充國陳漕運之功文淵策戰守之
便形勢斯在沃壤可知神考御天方昭睿略秦階陵述
事遂格休功紛過計以中更舉成謀而外棄皇靈震

武旅驩趨勢固易于建瓴歸遂同于縱壑金湯未改
號令更新凡在開國之勲盡出指縱從之効宜光寵渥
增賁賢勞冠千載之光榮聳四方之觀聽某久承膚
使夙愧空殮獲聞三捷之音莫預眾賓之後喜深載
躍望極增懷

賀黃漕遷秩啟

謝才叔

伏審祇承寵渥峻陟華資叙舜庭考績之優詔商典
懋官之舊述聞成命增激惟宗恭惟 某官器宇靜
深智猷通博遇事有不疑之決在公惟匪懈之憂百
吏承風凜若神明之畏九年足食出於指顧之餘天

子重稱其才朝廷無出其右果膺殊眷特拜茂恩殊
簪紱之榮觀契明良之嘉會使軒留愛已夙慮于公
歸廟鼎元勳將默符于帝賚即聞迅召入覲嚴宸某
素託恩庥且超威重

賀張漕改秩啟

史天秩

驟駕轉糧久膺煩使飛郵傳命新陟崇階榮居六品
之班光動二星之彩賓朋慶慰郡國驩呼凡屬獎題
幸增抃蹈恭惟 某官天球薦彩岳鎮儲靈鄉評羣
行之宗筆陳萬人之敵鵬程易舉驥足難留閔樞府
之牙籤卷玉宮之絳帳使便親東海出關千里之藩持

節夜郎入奏九年之績英聲騰達夙望巍昂正柱下
之法冠明陝中之刑鼎肅將忠敏歷踐清華尚虛西
挾之除徐領東洲之漕雲梯石棧不辭蜀道之難流
馬木牛遠訪草廬之製惠風扇物游刃發矧奮澄清
之志于攬轡之中講水陸之運于鑿潭之始蘇一方
之疲瘵權萬貨之低昂非獨有觀風聽吏之才又能
善富國強_民之術久勞心計簡在睿思降一札之璽
書加_嘉三年之課最優加賞典榮進勳階汪洋玉冊之
恩炳煥繡衣之寵表微一級雖含覽鑑之情車相九
遷應有封侯之地甘泉上計宣室見恩即趨曳玉之
班行慰彈冠之望某禮庭餘子管席舊遊棲遲黃綬
之蹤偃仰赤衡之影官資冷落幾成梅福之狂客路
悲窮愁常恐長卿之病追想下車之揖側聆增秩之榮
擗管操觚望風引領金蘭不改既懷世契之私燕雀
有依敢後履成之賀

賀宋漕改秩啟

俞仲舉

被恩行旆進秩榮階仰惟帝寵之申用慰賢勞之及
屬叨存記倍切_懼愉恭惟 某官氣渾南溟望高北
斗網提鄉校應樂育于菁莪器用人材助能官于棧
樸紛若舟車之運裕然府庫之充中外一辭公私兩

利風霜凜冽已三換于乘輅雨露霑濡復五遷于寄
祿仁由舜陟八奉堯俞垂紳黃闈之嚴正席紫垣之
峻伏念某誤緣礦質暫假銅章染翰通城誠預托冥鴻
之去承顏稱慶即瞻畫鷁之歸

賀蔣漕遷秩啟

馮圓仲

茲審第勞六勳遷秩二等欽聽寵榮之數尤深欣抃
之誠伏以 某官學博古今美兼名實歷幹四方之
劇周知庶事之原方提六路之舟車以足上都之金
穀俾圖言狀上結淵衷之知刻景成功首聞慶賞之
逮某素蒙眷愛亟沐謙膝函其在銘藏罔殫敷喻

賀邵憲遷秩啟

王祖昭

八寶慶成方需恩于率土千齡啟運俄進秩于榮階
聞嘉命之誕敷激懦衷而增抃恭惟 某官德溫荆
璞量溢黃波該通古君子之風磊落大丈夫之器文
章餘事舊借飛聲功業顯塗今看濶步暫屈星軺之
重出持霜憲之嚴天網恢恢幸寬容而有制王民聳
解服平允以無冤累對昌辰茂膺休命南州總使已
聞孔席之溫北闕思賢即迓曹裝之促某効官雖遠
蒙庇極深澤景仰崇墉恨無緣于接武發揚寒緒切有
望于知音暑氣正炎薰風尚細願智恬之交養庶福

復之來綬

賀王倅遷秩啟

孫賓老

仰承天寵榮進官聯考績中朝正星郎之班序增榮
 利別駕重侯屏之威儀凡屬庀庠舉欣鼓舞恭惟某
 官忠誠許國仁厚存心嚴嚴然烈大夫之規摹郁郁
 乎士君子之蘊藉早膺簡注茂建勳庸宜源遠而流
 長至陰施而顯報薦蔭陞華秩陟步秩步要津頌渙號于九
 重騰歡聲于千里士民慶抃草木光輝暫屈題輿宜
 久陳蕃之坐位膺前席式過賈誼之歸某備數下僚
 棲身巨蔭共裁竿牘聊陳賀燕之誠跂望門闈莫預

賓鴻之列

賀鄧倅遷秩啟

梁子輔

宣威玉壘克收平寇之功通籍金闈庸正策勳之典
 式頌明命允協輿情伏惟懽慶恭以某官識宏而
 深才大而敏介圭之錫申伯睿眷愈隆袞衣之迎周
 公僉謀胥協果膺溫詔入侍嚴宸六經之道同歸聊
 資讜論五帝其臣不及遂集大勳四征弗庭一戰而
 霜某受恩云舊趨覲尚稽喜聞琳館之開當遂洪鑪
 之託

賀劉太尉被召啟

毛伯穎

芝檢遐頒楓宸促覲安國家而祈社稷利久重于出
疆說禮樂而敦詩書望宜歸于謀帥璽書誕布與誦
交欣恭惟 某官天挺沉雄神資果毅星軺出使已
躬叱馭之勞玉帳論兵獨奮請纓之志自遭罹于國
難尤宣序于家聲世濟功名信西平之有子力清氛
稜豈秦國之無人果膺鞶鼓之思載駕弓旌之寵聚
米而為山谷地聞入告之嘉謀折筮以答羗夷退荒克贊
中興之丕績某從游茲久欣抃實深拘綴簿書莫備
中車之役激昂鈿槩願操銘鼎之辭

賀邵尚書被召啟

毛伯穎

薦膺溫詔促覲嚴宸丹宸注心俯契疇咨之望黃扉
光虛位位觀登用之榮民具爾瞻帝思俾乂將永清于
寰宇期大闡于經綸切以右序有周偶值中微之運
系隆我漢實開再造之基能整天綱必繫人傑一昨
初罹世變孰主廟謀狐裘可欺于誰從玉鉉不聞于
在上惟大信可以服鄰國乃偷一切之安惟至誠可
以格神明或昧三無之奉狂瀾既倒蔓草難圖致使
赤敏玩千變萬化于掌上闕 羅六韜三略于
胸中成此宏功每見有為而必就膺茲異數尤恨無
官而可酬眷注權輿寵光雜沓某自惟魚久品賴鴻

明鈔本不空然以
文殺觀之實有缺
字也

私諦觀綸綍之訓辭心旌已動莫側門牆之賀履顏
甲彌增喜頌惟深名言罔既

賀丁教授改秩啟

李清叔

竊審師筵榮陞京秩命出九重之與名參八品之崇
屬荷眷憐倍深喜躍恭以 某官文鋒穎銳經筵宏
深美成君子之儒妙出聖人之域偃然絳帳小鳴未
究于大鳴紛若青矜後覺用資于先覺果膺顯渥峻
陟榮階選調曩居十九年之日月宦遊今遠九萬里
之風雲仁從帝簡之優允列朝僉之望顧惟未屬幸
託鄰封念征棹之方還覺慶緘之已緩雖蒙豐照未

免包羞

賀張幹改秩啟

李仁甫

被恩宸檢通籍朝闈聞嘉報之誕揚激懦衷而增抃
恭惟 某官誠明貫道純正飭躬早從師席之嚴擢
貲使星之照一經決第聲華方動于元符八品疏榮
位貌果崇于大觀茲聞捷步即看橫飛屬緣冷局之
拘阻奉高門之慶傾風徒切握管奚宜

被召

賀趙相被召再相啟

毛伯穎

伏審絳車入覲對揚天子之光魁柄再專增重本朝
之勢璽書誕告與頌交欣竊以無競惟人以勞定國

惟君能制命堅佑賢輔德之誠則相亦有終致興衰
撥亂之効將紹隆于休運必先契于良圖百姓與能
樂宸衷之求舊萬邦為憲惟素望之所歸懿茲元臣
光我盛舉恭惟 某官學通倫類性迪中和達可之
謂天民每期兼濟含章以從王事勤不辭難自膺夢
卜之求獨運鈞陶之化裴度制千里之難綽有成謀
陳平遂萬物之宜不勞餘蘊推誠心公道而人情自
服加深思遠慮而國勢愈尊閔勞甞請于藩垣僉論
難掩于衮繡果膺詔綽歸總政機須渙號于丹墀簪
紳聳動壯威聲于紫塞牧圉妥妥光闡于淵謨以

宣昭于盛業受彤弓而揚休命晉侯陳三覲之儀錫
秬鬯以告文人召伯獻萬年之頌成功之懿振古莫
倫某素被眷知喜聞登用遙賓僚于東閣尚阻瞻承
躬親課于西疇但聞歌詠

賀趙丞相被召啟

毛伯穎

冕旒注想嘉召伯之有成棟幹倚毗從韓侯之入覲
侍金華之講勸高玉陛之謀猷民具爾瞻再運鈞調
之化帝思俾乂遂成底定之功方當休運之開宜有
繁禧之介恭惟 某官學窮道奧智測事機當軸處
中美化行乎邦國坐籌決勝威謀澹乎選荒方先獻

社之勳遠請偃藩之樂介縣神州久若鹽醴之役皇
 輿翠蓋未還蠖濩之宮悼心驚歲月之除屬目有山
 河之異鑿門推轂方寄重于藩垣亂轍靡旗反大侵
 于境土無救溝隍之昏墊空頻肝仄之焦勞天啟宸
 衷肆登庸于舊德朝推素望嘗展盡于成謀穆然宣
 室之思篤此翹車之寵萬事不理智將問于胡公四
 方是維任宜專于尹氏恭惟 某官斯文矩矱吾道
 淵源琨玉秋霜挺立朝之節槩太山北斗為後學之
 表儀鯉庭躬詩禮之傳龍鄉推人物之懿蘭臺編削
 踐班馬之章程鳳閣^演綸^揚邁常揚之典則司版圖于

民部顯尹正于天畿忽驚魏闕之零雲能奮秦庭之
 涕泣千乘取信獨推季路之言萬人雖多不望孟軻
 之勇心既堅于忠讜事罔擇于危疑排難解紛不受
 魯連之賞毀忠蔽信猶懼無極之讒僭羞安彩服之
 歡名字有金甌之記果再光于圖任以虛竝于弼諧
 帝曰俞哉久深知于劉向民之望也顧無出于謝安
 紳綏多附駁之誠餘艗有登仙之望也顧無出于謝
 安^奏紳^奏大韶酥酪弟兄助調膈于列鼎流音薇于簡策
 著勳伐于旗常與古為徒自今以始某誤叨英盼似
 有宿緣忤句短章首得拜龐公于床下稠人廣眾獨

蒙識孟嘉于坐中雖把楊雄不徵當世之愚願負馮
衍少事名賢之志喜聞新命殊激懦衷立名願附于
青雲求士必先于白屋彈冠結綬喜聞眾正之塗擯
翰操觚願紀太平之象

賀劉侍郎被召啟

毛伯穎

茂膺芝檢促覲楓宸大冊高文即踐鼇峰之峻贊元
經體仁觀鳳沼之澄聳動縉紳計安社稷竊以國家
垂萬年之統業儒術為一代之規模號令教條意悉
歸于忠厚公卿侍從選咸自于詞章用能跨虞夏之
彌文陋漢唐之雜霸爰自熙寧法弊始用奔走及事

之人宣和政驕遂成阿諛順旨之俗指清談為廢務

斥禮學于空文鷹擊毛鷲既毒于黎元狼子野心遂

延于社稷卒然大變何忍勝言尚賴九廟擁神靈之

休萬方悖忠厚之澤勃興睿主再造鴻圖八年于茲

可謂掃風而沐雨四郊未靖難於操木而削金蓋緣

執事之臣未燭本原之旨長槍大劍雖云救世之便宜

宜厚賦深荆未免斯民之愁痛劾晉臣東此輩于高

閣談漢祖溺諸客之儒冠憫然自高無復師古鑿門

推轂方寄重于藩垣靡輒亂旗反大侵于境土無救

溝隍之昏墊空煩肝仄之焦勞天誘宸衷肆登庸于

舊德明推素望宜褒顯于斯文仰禪聖莫大變頽俗
 必得國僑之辭可以服晉趙衰之文可以抗秦賈誼
 陸贄之才猷洞明國體李膺劉賁之學術切中時機
 莫如我公稱茲盛舉恭惟 某官景行先哲博極羣
 書窮游夏之淵源煥卿雲之黼黻閣中肆外茹古含
 今虎鳳蛟龍炳韓公之翰墨烟霞草木雄李白之篇
 章參韶濩之皦純配商周之廟壘橫經東序久聞孔
 道之明視草西垣坐見堯言之布至于激昂萬乘經
 營四方引詩書之格言陳宗社之大計開陳切至見
 玉坐之動容成效著明宜金甌之曲記儻從曲突徙
 薪之計當無逆坂轉圜之艱是膺宣室之思再錫翹
 車之寵討論潤色禪復古之大猷獻替論思訂御平邊
 之上策遂膺贊刻光踐階符陳伊訓說命之篇繼烝
 民崧高之什某早緣薄技誤辱隆知摘句分章久服
 樞衣之訓歌功頌德願操銘鼎之辭情動于中言之
 不足

賀鄭憲被召啟

周彥質

伏審渙被宸俞欽承召札捧綸言之溫密脫炎嶠之
 荒遐喜動高懷戀傾屬部恭惟 提刑奉議剛明無
 蔽仁厚有容欽謹用刑獄靡一夫之枉中和御俗訟

勤五聽之詳民無隱匿之情士絕淹迴之患歡聲周洽偉績著聞已寬南顧之憂果奉西清之對三年使遠有同太史之滯留萬里勤歸應嘆主父之見晚行膺寵異行陟禁嚴某夙荷殊私獲聞休命

賀張相入覲啟

毛伯穎

授齋鉞以出征獨高廟算奉介圭而入覲克奠皇居宗社尊榮以越忻豫既多受社方歌吉甫之歸克和厥中允賴君陳之訓世爰資于哲輔天宜錫以繁禧恭惟 某官廣大精微溫良恭儉以康王國久建晉侯之勲克享天心孰高伊尹之德自峻升于袞路每

顯決於籌帷布令陳辭避真儒之無敵治兵振旅期大
懋之克清既誅淫慝之鯨鯢遂設功庸之筭簾臨大
江而誓衆必繫翊戴之功登喬嶽以告功終偶明昌
之運願寵綏于福履以降就于功名某勉強餘齡撫
循遐壤制節謹度唯知道職之勤經體贊元密戴濟
時之願

此卷依明鈔本校定 辛未十一月初八日

聖宋名賢五百家播芳大全文粹卷十五

揚卷十六

聖宋名賢五百家播芳大全文粹卷十六

賀啟
賀觀

賀宮使太師啟

何子應

伏審三師顯冊將分鼎坐之穹隆一札異恩聊假琳
宮之密邇上以盡羣生^王延詳之禮次以全大臣難^盡
之名去就準乎古人體貌優於前代恭以 宮使大
資相公得天間氣為世真儒事業青雲彌久而彌大
精神黃鸞愈老而愈清學通今古之淵源言得詩書
之體要議論確全於是國勲勞力^致於邦榮出入三
朝任天下之重而不撓始終一節合聖人之和而有

卷十六

卷十六

一

容當資秉國之權旋錫還朝之命士心傾屬帝意褒
嘉法既變通唯宋璟能守以正時方紹述非畢公莫
能厥終竝看盛禮之班庭即慶元功之宰物某提携
小器追琢餘材艱難仕途者倏踰十年黽勉官事者
實厯六考雖樸忠而自信奈孤拙以誰憐載循簿領
之微蹤幸忝鄉閭之晚進執經隸業誦高文于韶鮑
之初歛版微官慕盛德於衣冠之後龍門就謁雖阻
望於光輝雁足修書固嘗通於姓字敢謂無階之小
子嘗形有味之溫言賜緘已重於衮褒傳誨更優於
金諾區區敝帚此時儻享於千金奕奕明堂異日當
參於一木時寒在候冬令方行乞上體眷懷倍綏福
履

賀宮使蘇丞相啟

程子山

伏審屢貢需封懇辭揆路亟遂琳宮之逸仍兼書殿
之華眾莫能留道逾為重恭惟 某官天鍾峻德世
服全能文章為一代之雄學術洞百家之奧逮持時魁
柄尤抃縉紳以芍藥之和調均鼎鼐以洪梁之任安
固廟堂屬熙事之慶成援舊章之而勇退開陳切至眷
諭優隆既悃幅之難回始吁俞之方下長孺之承帝
問宜在本朝仲舒之請家居每參大議某嘗叨顧盼

素沐知憐竊觀去就之間爰盡初終之美撫懦衷而
增慕非濡頰之可宣

賀宮使候中書啟

翟公巽

伏審得請宮祠歸榮故里雖老成去國之易而明哲
保身之全多士歎嗟饒韓侯之出祖邦人慰喜詠季
子之來歸恭惟 中書正色立朝遠猷經國方崇鼎
鉉之拜以正公槐之尊而乃深畏功名肆懷邱壑上
章力懇解組如遺仰高行之絕倫聞餘風而興起乘
安車而過諸子未慕前賢禪賜金以娛故人用償夙
志即膺宣室之召復佻袞衣之歸某荷眷特深辱知

有素願望塵之密適獲擁篲以候迎炎暑正隆川塗
尚阻

賀宮使大賚啟

鮮于天質

伏審錫寵真儒增華舊弼使琳館真游之秘冠金華
道學之嚴聖哲一時士民同慶伏惟 某官沉深端
亮博大高明學洞本源繙十二經而不涉語默識參
造化擊三千里而未始去來出以同人則後進之宗
師俯而應世則古人之事業九鼎為之增重多士所
以知歸維羣言罔間於艱難之時乃一旦出公於寬
閑之地必當起慰蒼生之望詎可往從赤松之遊召

自江淮進陪帷幄同符厚德均體冢司事已絕於前
聞榮固超乎近比甘盤舊學未更輔相之崇子房帝
師不見詩書之益永惟具美宜屬宗功工某猥以散材
潛希樂育竊幸藿蠟之能化自忘商距之弗勝未識
藩籬已有絕塵之嘆安知鑪錘空懷躍冶之私

賀宮使觀文啟

晁之道

伏審中頒召節入覲清光護琳館之真游侍金華之
聖學側聞寵渥交慰輿情恭惟 某官敦大宏通高
明忠裕富以游夏之經術發揮唐虞之文章左右熙
朝謀謨庶政積經綸化俗育之丕績秉忠恪致君之小

心暫處北門即歸中禁蓋睿眷嘉隆於舊弼而盛德
宜在乎本朝多士所以知歸九鼎至於增重某久塵
眷獎屢玷陶鎔聳動詔音適縻使事莫遂埽門之願
徒傾賀厦之誠

賀宮使太尉啟

晁之道

伏審中頒召節促近清光擁元帥之旌旄備弼臣之
寵數密司琳館進侍金華百辟聳瞻萬方胥慶恭惟
某官高明忠亮博大宏深掌握洪樞謀謨大政固
已致主唐虞之上方且比蹤夔契之間復自江淮進
陪帷幄觀聖上虛已待公之意與多士傾心仰德之

誠實唯千載極盛之時宜建萬世無窮之烈亦惟天
意豈獨人謀某夙以冥頑誤玷陶冶屬外廩於使事方遠
阻於賓閔竊與萬物以同榮詎止微生之有託其為
欣頌更倍等頌

賀宮使趙待制啟

于子儀

光膺恩制進陟邇聯除目一騰公議僉允伏惟慶慰
竊以國家簡拔俊望寵以延閣之華優禮近臣列於
真祠之職非有名世瓌璋之價曷膺當仁待遇之隆
恭惟 某官杞梓宏材璠璣重器文詞英麗名擅儒
科道學該詳聲高菡苑屬乃聖眷求於同姓俾公族
方駕于時髦果得真賢仰符帝意行貳中臺之峻延
登揆路之崇某猥以庸姿素叨提獎已託亢宗之賜
更依造物之私踴躍忻愉倍萬等頌

賀宮使叅政啟

晁子止

樂聖避賢願歸印綬過家上冢言反里閭釋政省之
憂勞獲故鄉之安便難稽遠業暫佚真祠恭惟 某
官名高縉紳勳在社稷昨遇有為之會皆稱難得之
時若不折夫虜衝漢則幾殆今猶傳於境外秦豈無
人帝不忘於念功君將倚於納誨為政者每人而悅
誰復能然不知者謂我何求公亦奚恨惟大臣進退

之際本前賢出處之常溺者由已溺而飢者由已飢
莫識胸中之志仁者謂之仁而智者謂之智一付
天下之言某早被深知肯同流俗當將相和而士附
自揆涼薄而安敢前及賓客哀而家居則思親近而
不忍去輒懷管見仰測天心聘使或來必聽張昭之
不在國家所安賴安容裴度之常閑

致賀文太師致仕啟

汪彥章

伏審懇章得請褒冊疏榮辭二鎮之節旄仍三公之
爵命功成身退於迂衡之日心廣體胖於佚老之初
凡在聞知孰不欣仰恭惟某官元精孕粹崧嶽降

神智足以照眇忽之先才足以當安危之寄運籌將
幄坐戢於五兵論道鼎司久熙於庶績風采相聞於
今世聲名暴著於外夷望高累朝寵極一品方且優
游故里嘯咏昌時屬二聖之紹休圖舊人而共與雖
高情傲物喻浮雲脫屣之輕然者德在朝增大呂黃
鐘之重安巾車而入覲副側席之詳延周公之老在
京師豈私諸已裴度之事在軍國適膺應其時果賴元
猷一新初政九功於是咸叙四方以之無虞廟堂方
倚於深謀泉石遽形於歸思幡然而起非為利所以
安邦浩然而歸豈收名欲以尊主進退必由乎義出

入皆視乎天側聆繡衣之華近抵澗溼之澳涼臺暑
館莫非綠野之餘怪石奇花幸是平泉之舊足以探
窮勝事恬養太和寓形閑曠之鄉放意舒長之日某
夙叨士品嘗奉台光屬官府之坐縻阻門牆之展慶
乃誠欽抃實冀常美

賀文太師致仕啟

王介甫

明制閔煩安車歸憇位在三師之首名兼兩鎮之崇
証告敷文具瞻胥慶豈惟未契竊仰高風恭惟某
官聲冠時髦望隆國棟天應時而生德帝攷寔而念
功蕭何漢之宗臣方叔周之元老寵虛莫二宜受社

之難窮懇惻有加遂留賢而弗獲瞻承雖阻企慕寔
深

賀劉太師致仕啟

程子山

力解繁機榮頒顯冊秩視公卿之峻名兼將相之崇
寵絕百工慶流三族恭惟某官代天元氣為世真
儒崇論懿言八載密裨於帷幄豐功利澤期年即徧
於華夷方欣鼎鍊之調遽露囊封之請上以閔煩而
賜可自知何恙而不瘳慎厥始而成厥終疇能比績
恍然辭而問然應初無容心某久託鴻鈞欣聞異數
適阻江湖之遠莫遑塔城之趨以公歸兮猶想周人

排教力

之望為王留者誰知孟子之心氣候清和精神暇裕
願益加於調音用深副於眷懷

賀韓少師致仕啟

何子應

此乃毛伯舒賀韓少師
應答韓少師原任
用劾奪別錄後

伏審懇辭公級得謝帝庭動四海之聳觀見大臣之
榮事竊以時合而奮力者易功成而乞身者難故君
子於進退之間使天下無始終之議伊誰能此全德
在茲宜異數有加升拜師臣之重渙恩既渥仍兼書
殿之崇垂耀士林光載史冊恭惟 某官學窮道奧
識照幾先正論鴻辭侍清光于禁闈嘉謀亮節運造
化於洪鈞係天下之重輕儼朝廷之表式力辭機柄

確上囊封固宜諭留再三期請十數安車駟馬既得
乎高閑佳木清泉以適乎嘯咏超然至樂邈矣高風
眷懷老成之人典刑斯在養此剛大之氣壽祉無窮
某慕德徒深辱知有素倍切賢哉之歎仍動歸輿之思

賀趙少保致仕啟

王介甫

抗言辭寵得謝歸榮繇西省諫辯之官序東宮師保
之位殿庭鳴玉尚仍前日之班里舍揮金甫遂高年
之樂伏惟 某官懋昭賢業寅亮聖時伯夷之直惟
清仲山之明且哲所居之名赫赫豈獨浚思爾瞻之
節巖巖方當上輔遂從雅志實激貪風未即披承徒

掛之

深瞻仰

賀韓丞相致仕啟

石守道

伏審挽留須眾懇請益堅亟辭京鑰之嚴將就里居
 之逸屬時圖舊從欲固艱諭旨丁盜還音絡繹伏惟
 某官文武全器忠嘉一誠端耆德於鎮浮據壯猷
 而經遠股肱勵翼綏四夷於先朝袞繡光華賁羣英
 於昭旦况乃堂荆相紹增大家聲壘荒同音迭熙帝
 載虎符犀節出言涵養之仁烟閣雲臺入應功名之
 會具瞻斯在勇退安能願承賸倚之深衷聊緩恬愉
 之雅意赤松遊行難遵相漢之言黃髮詢謀勉蹈秦

公之哲其為悃悃未易敷陳

賀魏大叅致仕啟

宋文淵

懇謝領機寵頒殊渥冠宗班於書殿躋峻陟於文階
 方疇霖雨之賢進顯秉筆乃抗浮雲之義早遂掛冠
 帝惜老成之莫留士歎明哲之難繼差歷數聖朝之
 近輔幾全賢德之高明歐陽子乞身而歸乃罷政之
 後清獻公引年而去非釋位之初然後野史屢書朝
 士交贊而况位方居於廊廟名正立於鼎彝竦岩石
 之具瞻懷急流之勇退是為希曠孰與等夷恭惟
 某官命世碩儒爽邦鉅哲佩龍淵之賜夙長文昌之

六聯躋鳳詔之班纔下丞相之一等既任安危之重復為進退之光子房雖暫與赤松之遊安石必更為蒼生而起某早蒙提獎晚荷陶甄望夫子之門牆自憐拘繫侍先生之几杖未獲周旋意傾向以彌勤詞鄙訥而難盡

賀趙大資致仕啟

曾子固

進秩宮朝歸榮里閑伏惟慶慰恭惟 某官言為著蔡行應準繩肩一德以在躬歷三朝而遇主謹言大論著在廟堂善政流風被於藩服引年求謝抗疏彌堅屢降德音方倚老成之重難回壯節閱有官職之

勞躋陞儲案之華退遂居家之樂門開祖帳眾歎大夫之賢庭列賜車自知稽古之力惟能諧於素志實何謝於昔人某早荷陶鈞與遊門館觀大賢出處之迹足勸大倫知儒者進退之宜敢忘師慕其為欣躍倍萬等倫

賀李少師致仕啟

鄭顧道

得請抗章以諧謝事為臣之義至此克終知止之風凜然可尚伏惟慶慰恭以 致政少卿儒林厚德士路老成守約而剛中體仁而利物豈止可行於州里亦將無負於神明固嘗屢縉左符峻登列寺光華二

節統制連城履歷之間事功彌力天台遍覽固知體靜
而心閑東海既歸且免鐘鳴而漏盡某縻迹晉繳心
畏簡書萬里故山但久聞於鶴怨九重迴漢空仰慕
於鴻冥

賀夏守致仕啟

李致勳

伏審祇命拜嘉引年得請寵升郎秩歸秩秩鄉閭凡在
見聞共生欽羨恭以致政朝奉文雅飾吏廉平在
公挹謙常戒於滿盈酌損固知於止足琅琅刻奏亟
歸老以乞身凜凜清風可激貪而立懦俞音獎勉寵
數光華放懷泉石之間寓意雲霄之外弗圖題眷與紆

貺函題欣頌惟深占言賜既

宰執除帥守

賀張丞相帥金陵啟

胡仁仲

伏審光膺制綽榮鎮留都起自東山蓋素推於雅望
圖茲南土遂益振於先聲凡有識知於胥鼓舞恭惟
某官當朝元老命世真儒學窮東魯之淵源文擅西
崑之氣象方維奠位仰八柱之承天海宇重光瞻五
雲龍之夾日關河響動宗社奠安名遂功成來游綠野
神和志定久伴赤松唯用則行而舍則藏斯進以禮
而退以義果逢盛旦圖任元勳至公若氷生理如洗
鸞坡鳳掖載嚴秋殿之榮崇班虎踞龍蟠全昇上流

之重地運奇兵於掌上墮點虜於目中百城咸肅於
威聲四海頓周於和氣江山增勝疆場愈安瑀戈淑
旂允賴金城之勢玄衮赤舄即還玉鉉之司某仰望
光塵拘縻職守潭潭公府比幸遂於鳧趨兩兩台階
即莫諧於燕賀隆冬載候景貺來宜願言茵鼎之詞
仰副冕旒之眷

賀朱丞相帥紹興啟

汪聖錫

伏審輟從經幄就領帥藩還秘殿之隆名建行朝之
巨屏遜聞新命同極歡心恭惟 某官德茂儒宗才
優王佐高明淵懿之學素博極於羣書疏通雄傑之
文獨兼全於數器名喧宇宙會感風雲徧揚簪橐之
華亟拜鈞衡之重遭時多故能人所難夷狄長驅而
笑談救盜當匹馬渡江之日免渠作逆而從容處決
成五龍夾日之功忠嘉昭宣識量宏廓久淹留於湖
海實注想於宸旒衮衣繡裳方趣還於北闕朱轡皂
蓋聊借重於東郊諒亦假途即還揆路某受知頃歲
阻闕有年早荷鈞陶采及葑菲之下比交印綬實慙
糠粃之前承教匪遙向風竊抃方炎曦之在候屬旌
騎之戒塗跋履之間節宣是禱

賀湯丞相帥紹興啟

李仲信

伏審疏榮顯冊倚重元勳天柱仗還歸釋留宮之管鑰
帝城密通擁會府之麾幢身獨係於安危任靡殊於
中外豈特三輔吏士睹漢相成儀之盛以至四夷君
長仰晉公德望之崇恭惟 大安撫大觀文僕射相
公曠代鍾才際世空益識商盤周誥夙高華國之詞蕭
規曹隨更大經邦之業昨見臨於狂虜上渴想於壯
猷繫天下之心亦既歸於大老屬關中之事夫踰於
宗臣逮龍馭之言旋解麟符之居守蓋北伐張仲在
矣已資孝友之良故東郊君陳往哉宜付保釐之重
維時越會為國輔藩式順舊相之臨用壯元戎之寄
河潤九里惠及并於神京星齊三台柄即還於天宰
某久蒙決北逖望熒煌猥緣簿領之縻阻展門牆之
慶

賀呂丞相帥永興啟

周彥質

伏審祇膺睿誥寵解台司陟秘殿之崇資開雍都之
大府功成治定而歸其政名遂身退而全於天四海
具瞻輿情欽羨恭惟 某官受天間氣命世雄材軒
昂為廊廟之倚毘出處繫朝廷之輕重自躋近侍益
著徽猷屈伸不替於初終夷險常持於一節越二聖
亮陰之際方百官總己之初敷求哲人用集大命訪

於落止厥維艱哉爰召越起於坤維遂進參於國政旋承綸綍聿正鈞衡卓然吐胸中之奇屹若任天下之重有周勃霍光之沉厚兼姚崇宋璟之斷謀異鞅鞅之少臣信堂堂之真相陰陽調協華夏乂安勲列巍峩典章炳炳煥方舉告成之美屢形均逸之休俄渙汗以明揚容偃藩而自適思建國者一百餘祀致上宰者五十八七人雖久任者三員亦罕踰於九載盛矣今日之懿掩乎前人之休撫桑梓之舊邦釋樞機之重責詩書作元帥况儒者之極榮富貴歸故鄉亦昔人之至願喜動關中之父老歌騰隴上之耕樵揮金交

里開之歡飛蓋蓋遂家山之樂錦衣信美未忘補袞之思鼎足猶虛終假和羹之助願遂綏福履永託陶鎔某夙荷殊私獲開休寵

賀陳丞相帥閩啟

熊子復

伏審光膺新渥起殿大藩上宰方虛將共迎於袞繡故鄉甚通聊再擁於麾幢休聲不約而皆同和氣非召而自至實寵大賢之曠典豈循舊弼之彝章恭惟安撫大觀文丞相道術儒宗才猷國老仲虺為湯之左相早輔萬機申伯式周之南邦久臨七聚高寓紫宸之秩歸尋綠野之遊帝垂想於元勳民具瞻於

碩德圖舊而任其政將復正於台衡接近而與名藩
姑重分於帥聞諒幕府方傳於號召而都門已集於
班迎某猥以非才薦茲誤寵輔邦引疾本祈閑散之
居潛府移麾更受劇煩之任幸承前躅仍倚中樞蓋
黃霸穎川之教條洪纖畢具而裴度興元之節制遐
邇共尊方謹奉以周旋庶悉忘於愁恨

賀張丞相除帥啟

劉共父

眷懷舊弼誕播明倫還秘殿之隆名建上流之巨屏
五侯九伯暫尋鈇鉞之征一日萬機即正鈞衡之任
慶關宗祐喜溢神人恭惟 某官道冠古今勲存社
稷扶世導民之術本自得於詩書憂國愛民之忠宜
獨貫於日月當國家二百載中天之運正君臣一千
年際會之期仗大義於板蕩之中變危機於呼吸之
頃取虞淵之日功孰大於昌唐封函谷之峽泥略更高
於全蜀既勒名於鍾鼎旋正位於巖廊方布德於兆
謀爰整軍而經武誓清沙漠尅復神州然而功成者
天道廢有命在我何憂於用舍於時實繫於重輕身
雖退而道愈光望既隆而忌益衆誰為巧舌敢肆流
言曾虺蜮之不量豈棟梁之可撼九夷何陋自安孔
子之居四國是道久起周人之詠斯文未喪羣枉聿

消宜一人想注之深慰八表具瞻之望過召還於南
服聊卧護於北門何煩三日之報成即聽十行之趨
覲多士聞風而起喜此大老之來歸四方扶杖而須知
太平之有日某頃緣恩契蚤辱記憐逮風波之橫興
方羅織之四起念寒暄候問無益於門下而事機偵
伺或致於讒言缺然問牘之陳蓋亦三年於此仰止
受恩之地未嘗一日輒移雖形迹之若疏尚衷誠之
可鑒倘蒙畢照少追謹訶庶幾餘生永有依怙重念
某稟資劇陋賦命數奇蠢愚涉世之甚踈坎壈扼窮
而未艾緣姓字嘗汙於科籍故踪跡偶遘於閨臺曾
越日而幾何亦惟讒而遽去冒寵甘分於罷黜噴言
更玷於私恩俯仰懷慙跼蹐無措茲踰伏於里舍
獲傳誦於策書自欣末路之零丁將託化鈞之塊土
收東隅之失意敢忘於桑榆賀大厦之成情方深於
燕雀精誠並揭悃悞奚殫

賀文太師帥北京啟

蘇子瞻

乎號揚廷臨軒遣使出節少府授鉞齋壇夷夏聳觀
兵民交慶蓋功業甚大則極名器而後稱惟德度宏
遠故舉富貴而若無蔚為三世之宗臣豈獨一時之
盛事恭惟 某官道本天合德為人師信及三川之

豚魚威加兩河之草木身任休戚言為重輕始若留
侯弱冠而遇高祖晚同尚父黃髮而亮武王既奉冊
書益新民德方將威懷北虜係頸長纓約束河公軌
流故道然後入調伊傅之鼎歸躡喬公之遊輿論所
期斯言可必某謫官有限超侍無緣踴躍之心宣寫
難盡

賀韓司徒帥北京啟

歐陽永叔

榮被恩俞勉從懇請極便蕃之寵命均休逸於名邦
伏惟 某官誠明發揮德業久大三朝願遇百辟表
儀挺金石之純誠當國家之大事上所取信有疑決

於元龜民之具瞻為望重於九鼎屬聖神之嗣統方
毗倚於老成而功高不居志確難奪爰併推於異數
用顯答於元勳孰不秉旄詎有兼持於雙節昔嘗衣
錦今而盛服於九章極古今儒者之至榮保進退君
子之全德某願惟哀懦久辱知憐聆誕告之頒行極
私誠之竊抃隆寒屆候大旆啟行伏惟上為廟朝精
調寢膳

賀劉中書帥北京啟

陳仲思

伏審加榮舊弼改鎮北門懽聲所臨和氣自應恭惟
某官高明而善下博大而有容才周文武之全故

掛功

時當可為而將相並任職照幾微之本故事至輒應
而功名獨階河朔視三路為雄而全魏又四帥之
冠遠震胡虜近屏京師凡留鑄之守臣皆秉鈞之元
老而執事以四海柱石之望屬千里旦暮之期積告
后之久勤茂安邊之新略簡於眷眷迪茲寵光惟時
別都實曰舊部民物飫承於德澤謳謠久竝於旌旄
詔命既傳閭里相賀前知指顧驚號令之一新舊服
威名覺河山之愈重即諸嘉績歸用本朝蓋先正實
佐昭陵號稱碩輔而宰事紹登宰席克振家聲縉紳
莫望於清塵朝野莫容於寔事某才既淺薄命亦奇
窮譽未信而毀可疑志雖修而身愈困嘗妄意古人
之未學蓋竊師盛德之餘風顯成獎飾之言銘在肺
腑陰陽陶鎔之力將借羽翰顧夙心之獨違撫弱植而
深慨茲承朝夕之乏獲依節制之尊倘許秉鞭遂諧
發藥豈徒大慰平生之願庶幾不終小人之歸欣頌
極深精誠並竭

賀陳觀文帥北京啟

滕子昭

伏審載嘉外庸申錫中詔眷岩廊之舊弼極秘殿之
寵名深倚壯猷仍司留鑰威懷戎虜慶動縉紳恭惟
某官博大宏深靖恭端亮攬輝天宇驚四海以先

鳴振藻帝文冠二京而獨立領袖髦士羽儀盛時惟
昭陵選擢以宜遺四時朝故先帝延登以熙庶績道契千
齡之旦謀當列聖之心兼濟之才發為霖雨前知之
識効若元龜是以踐夷險而弗渝極寵靈而愈泰雍
容出處無閑可尋恒赫功名滋久彌白薦煩妙略留
總全師雖少鬱於具瞻用仰寬於北顧行歸公袞入
贊卿雲蓋選眾必屬於臯陶而用舊莫先於裴度一
時多士詠德宇以傾心九服嘉生跋恩波而矯首人
情如此神聽可知某猥以疎愚謬塵盼接收之已廢
惠以不孤永懷莫報之恩大唯有少堅於晚節把疴
間里驚藜藿之既生深極目山河悵旌旄之獨遠但
勤瞻頌載跼寢興

賀洪樞使帥金陵啟

陸務觀

伏審祇奉宸綸寵司留鑰龍蟠虎踞坐增形勢之雄
箕張翼舒頓覺精明之改望隆根本聲聳荒遐恭惟
某官學貫神明文周經緯鍾異祥於番水夙推命
世之賢應瑞識於螺州出擅濟時之輔早簡冕旒之
眷徑躋簪橐之班視草鑿坡大手載傳於奕世判花
鳳掖斯文咸萃於一門是謂儒者之至榮卓冠本朝
之盛事既家聲之霽著宜眾望之攸歸遂自北垣非進

陞西府運籌制勝精神折千里之衝端委居朝文武
 為萬邦之憲方賴謀猷之告后遠存明哲以保身謝
 公獎慰於蒼生難從均逸裝度歸遊於綠野孰與成
 公功果奉賜環屢專分閭帝念當塗之控扼時資舊德
 於鎮臨雖眷倚之甚優然經帝綸之未究爰保受釐之
 託式寬憂顧之懷威名肅而軍律具嚴惠愛孚而民
 情胥悅方將訓兵積粟備萬乘之時巡擊楫誓江贊
 九重之恢復深入風雲之會大輸日月之忠行副岩
 瞻即持魁柄某自惟魄瑣久辱眷知擢第太常誤塵
 衡鑒効官徧壘復託帡幪欣聞顯冊之頒獨倍常情
 之喜雖深賀履建情未遂超隅之願小物克勤遠繼畢公東
 郊之命膚公迄奏願歌宣王北伐之詩

賀劉樞使帥金陵啟

熊子復

伏審召以追鋒委之留鑰神機宥府夙嘗贊於經綸
 天塹陪京還遂顯於總攝攝麟符愈重虎帳增嚴竊以
 十國為連當近畿而特要八命作牧復舊弼而尤尊尊
 宜秣陵眾大之區寄樞筦老成之輔恭惟 留守大
 資樞密望高一代眷厚兩朝揮毫而萬象駿奔文上
 追於典誥運籌而千里決勝武外暢於戎夷一別帝
 宸三移帥壺比親籌於宿望付居守於別都穩駕高

持之太全

檣越洞庭而東下趣裝小隊望建鄴而北歸雖神向
匪遙固方資於河潤然台宰尚缺宜早副於岩瞻某
幸託餘輝欣聆異渥把麾有守阻慶於崇墉弄翰不
工謾控忱於竿牘

賀王樞使帥江西啟

黃仲秉

伏審欽奉制綸肅更齋鉞西樞舊府顯天官一面之
朝南紀上游寄大國三軍之命兼注安危之意匪殊
中外之途立功立名甚善甚喜恭惟某官剛雄蓄
德忠敬存心四紀服勤三朝著節愛民憂國自有從
來樂事赴功未辭以歷試英聲宣於夷夏高誼薄於

雲天彈邪而白簡凝霜次對而丹誠貫日爰寤聖神
之主亟登宥密之司東臨建鄴之雄藩西闢豫章之
幕府橐皐戰纛豈獨壯於戎亭藻火山龍仁恭華於
宰席涓辰及吉視事云初風以琴薰月惟陽正願體
六符之眷先精五鼎之調瞻頌之懷敷陳罔既

賀王樞使帥金陵啟

楊祐甫

伏審起自祠官典司留鑰文事必有武備兼資牧御
之才地利不如人和所賴安強之德命崇汲直喜動
周行恭惟某官博厚承天剛明有道張仲孝友獨
留詠於中興許公文章最賞音於上意自再登於丹

地旋首冠於紫樞居安慮微則威振於五兵講信修睦則志輕於萬里忠誠貫於金石勲烈被於鼎彝方將為王者師如周尚父乃棄置人間事從漢留侯惜然脫屣而還觀者岸憤而嘆雖萬乘重煩以政而四海思見其人爰昇上流不從中御保釐東郊者畢公之休命卧鎮北門者裴度之異恩服以上公露冕而章有德光於信史衣繡而歸故鄉隱若長城坐固吾圍某早陪簪索晚被陶甄方聞馬牛之風徒深燕雀之喜太山名重雖百二之雄三台色齊顧應半千之運

賀魏大叅帥紹興啟

翟公巽

懇辭機務暫領藩條聯秘殿以通班禮亦異數輔神京而作屏威不違顏播告邇聳動觀聽恭惟某官受天大降為民先知障百川而迴狂瀾俾傳正學洗萬古而空凡馬獨備全材自居獻納之聯已負弼諧之望回翔甚久注倚彌深昨趨召節之嚴亟踐仕途之峻風采聞於天下朋黨去於朝廷以贊尚書萬幾之煩毅然退寵乃眷長安三輔之重聊爾均休縉紳益具於岩瞻輦轂大蒙於河潤彤弓盧矢姑作諸侯之師袞衣繡裳仁為天子之相某逖聞殊渥喜託

拙齋

餘輝仰止高壙尚有山川之間懷哉小壘自憐松菊
之存願與閭閻之細民同頌廟堂之老手子意傾深切詞
拙奚殫

辛未十一月初九日校明鈔本

聖宋名賢五百家播芳大全文粹卷十六